

Jaishankar-i China Foreign Minister Qin Gang den senden amen



March 02, 2023 nü New Delhi nung G20 Foreign Minister tem senden nung India External Affairs Minister, S. Jaishankar-i jembidang tangokba noksa nung angur.

New Delhi, March 02 (Agencies): Brihostibarnü New Delhi nung G20 Foreign Minister tem senden mapang India External Affairs Minister (EAM), S Jaishankar-i China Foreign Minister, Qin Gang den jurila senden ka mena linük ana arrtsülen tensa atema jembida.

Jaishankar aser Qin nati India aser China na tsüingda tesendaktep tsütsü tayongzükba onük balala nung o lemtep, talisa arrtsülen tesünep alitsü atema jembidogo.

New Delhi nung Gang den senden tembangba sülen Jaishankar-i twitter ajanga, "#G20FMM senden alidang nikonngdang China Foreign Minister Qin Gang den jurila senden ka menogo. Künati linük ana tsüingda tesendaktep dak sendakba tayongzükba onük

balala nung o lemtep, talisa arrtsülen yimjung aser tesünep alitsü atema jembidogo. Künatisa G20 onüktem nunga o lemtepogo," ta metetdaksü.

Lenir anati Ladakh arrtsülen tensa majungba atema jembida. Küm ana tejaklen anüdoklen Ladakh nung linük ana tsüingda sepaitem rara adokba sülen linük ana nungi military commanders level nung senden 17 ben menogo.

Yaküm December ita nung Qin Gang-i taoba Foreign Minister Wang Yi melenzüka Foreign Minister tenangzükba agiba sülen tang mezüing pai New Delhi semdang.

Brihostibarnüsa Jaishankar-i US Secretary of State, Antony Blinken-a ajurua Ukraine nung rara aliba densema tongtibang onük aika nung o lemtepogo.

Senden tembangba sülen Jaishankar-i twitter ajanga, "#G20FMM senden mapang nung US Secretary of State @SecBlinken ajurua jurila senden menogo. Iba ya linük ana tesendaktep reprangshitsü aser alima nung tongtibang onüktem nung o lemteptsü atema maongka tajung ka liasü," ta metetdaksü.

G20 züingsem linüktem indang GDP ji alima GDP shilem 85, shishilembaba shilem 75 dak tema aser alima nütsüing shilem asemsü nungi shilem ana shi lir.

G20 nung züingsem linüktemji Argentina, Australia, Brazil, Canada, China, France, Germany, India, Indonesia, Italy, Japan, Republic of Korea, Mexico, Russia, Saudi Arabia, South Africa, Turkey, UK, US aser European Union (EU) lir.

Lok Sabha election nung TMC-i tangar den melokteptsü: Mamata

Kolkata, March 02 (Agencies): Brihostibarnü West Bengal Chief Minister aser Trinamool Congress (TMC) tongti lenir, Mamata Banerjee-i sangküm Lok Sabha election nung TMC-i tanga party kecha den-a meloktepi party kijai tokteptsü, ta metetdaksü.

"2024 elections nung TMC kijai tokteptsü. Nüburtemi pusema onoki tokteptsü. BJP tamakok ngudaktsünertemi TMC nem vote agütsütsü, ta ni amanger," ta lai ashi.

Taruba Lok Sabha election nung Ato kilonser Modi-i aniba BJP sorkar atsüingdoktsü atema opposition party tem longjemtsü atema jembida mapang ka nung lai iba osang metetdaksür.

Tang Lok Sabha nung TMC MP 23 dang lir.

Lok Sabha nung opposition party tulutiba anaji Congress (MP 52) aser DMK (MP 24) na lir; iba sülen tasembuba jenjang nung TMC lir.

Bodhbarnü Tamil Nadu Chief Minister aser DMK tongti, MK Stalin-ibo, Third Front lira majungtsü, anungji Opposition party temi Congress den longjemtsüla, ta metetdakja liasü.

Stalin-i, party kari Congress maliba front ka tentetsü jembir, ajisüaka ibaji magizüktsüla, ta ashi.

Stalin-isa, "2024 elections ya- shirnoki sorkar akümtsü, ta masü saka shirnok ket nung

sorkar tashi malitsüla, ibaji tongti südaktsütsüla. State yimtenren tsütsü tangatetba balala nung ajemdaker linük jenjang nung politics saira asenok dang takoksa angutsü. Tesüiba küm pezü tsüingda Tamil Nadu nung onoki (DMK-i aniba Secular Progressive Alliance) election ajak nung takok anguba kulji telongjem ajanga lir," ta ashi.

Brihostibarnü Mamata Banerjee-i, TMC anema Congress aser BJP na loktepa lir, ta ashi.

Sagardighi by-elections nung Congress-i takok angubaji tim masü, TMC tamakok ngudaktsütsü atema Congress aser CPI(M) na tsüingda tangatetep liasü, ta lai ashi.



New Delhi, March 02, 2023: G20 Foreign minister tem senden nung adentsü atema China Foreign Minister, Qin Gang-i India semdangba anema Akhil Bharatiya Mahila Congress nung züingsemtemi longkak aйдang tangokba noksa nung angur.

CEC aser ECs shimba tsütsü SC obendang pelaa agizüker: Asaduddin Owaisi

New Delhi, March 02 (Agencies): Brihostibarnü AIMIM Tir, Asaduddin Owaisi-i Chief Election Commissioner (CEC) aser election commissioners (ECs) shimba tsütsü Supreme Court-i agütsüba obendang pelaa agizükerogo.

Ato kilonser, Lok Sabha nung Opposition Lenir aser Chief Justice of India densema aliba committee kati benokba nung ajemdaker ang Tiri CEC aser ECs shimtsü, ta Supreme Court-i obendang agütsüogo.

AIMIM 65buba Foundation Day anogomong sentong nung lokti den jembidang Owaisi-i, SC obendang ajanga inyakyim teladak akümtsü imlar, ta ashi.

"Democracy atema Election Commission aser pa (election commissioner) tashi jurila alitsü nüngdaker," ta pai ashi.

Constituent Assembly nung Arrla 324 atema o toktepeba mapang nung ajaki election commissioner nem tashi tali agütsütsü melunga liasü, ta pai ashi.

Chief Election Commissioner aser election commissioners shimba nung executive-i jangjongga shilem

agiba aija Brihostibarnü Supreme Court-i, Ato kilonser, Lok Sabha nung Opposition Lenir aser Chief Justice of India densema aliba committee kati benokba nung ajemdaker ang Tiri CEC aser ECs shimtsü, ta obendang agütsüogo.

Justice K M Joseph-i aniba judge pongu aliba Constitution bench-i CECs ase ECs shimba inyakyim nung sorkar tashi mamshitsü nükjidong nung iba obendang agütsü.

Parliament nung ozüing ka meyanglu tashi ibaji benschitsü, ta SC-i metetdaksü.

"Democracy wazüka ayutsü atema election inyakyimji merükteta alitsüla. Yamaji mesüra ibaji ajanga timtem tulu adoktsü," ta justice Joseph-i metetdaksü.

Kasa senden nung jembidang AIMIM Tiri party nung lenirtem dang taküm küm tatembanglen Telangana nung agitsü aliba Assembly elections atema renem tenzükang, ta ashi.

Telangana nung terenlok alitsü aser tejakleni aotsü atema tesempa anentsü aser yimjung alitsü nükjidong nung renemtsüla, ta pai ayongzük.

Ukraine nung yimjung atema inyaktsü junga renema lir: PM Modi



March 02, 2023 nü Rashtrapati Bhavan, New Delhi nung Ato kilonser, Narendra Modi-i Italy Ato kilonser, Giorgia Meloni agizükdang tangokba noksa nung angur.

New Delhi, Metsremi/ March 02 (Agencies): Brihostibarnü Ato kilonser, Narendra Modi-i, Ukraine nung rara anentsü atema yimjung agitsü asoshi India junga renema dang lir, ta metetdaksü.

Italy Ato kilonser, Giorgia Meloni ajurua senden amenba sülen Ato kilonser Modi-i, "Ukraine nung rara tenzükba mapang nungi India-i, iba rara ya ken o jembiba aser yimtenren ajanga inyakba ajanga dang bentetsü akok ta shia arudar. Yimjung atema inyakba maparen nung India-ia shilem agitsü junga renema lir," ta metetdaksü.

Osangbenertem senden nung Modi aser Italy Ato

kilonser Meloni nati kulemi jembidang Meloni-i, "India G20 Tir asüba mapang nung Ukraine nung rara anentsü atema India-i tongtibang shilem agitsü, ta Italy-i imlar," ta metetdaksü.

Modi-i, Italy Ato kilonser tenati Ukraine nung rara aliba ajanga terenlokdak linüktem kongshiba atema tebilemstü akaba lemsatepogo, ta ashi.

Paisa, Ukraine nung rara ajanga linük ajak nung chiyungtsü, fertiliser aser totzü supply nung kongshioogo, talisa terenlokdak linüktem kongshioogo, ta metetdaksü.

"Iba tebilemstü onük atema künati jembida aser longjemter inyaktsü tongtibang ta jembidogo," ta Ato kilonser, Modi-isa metetdaksü.



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : f Tir Yimyim tiryimyim@aolima tir yimyim TAPAK 2



Vietnam tir inyaksü Vo Van Thuong shimogo



Lok Sabha election nung TMC-i tangar den melokteptsü: Mamata

VOL. XX NO. 140 (ADOK 140) DIMAPUR ROGONÜ (FRIDAY)

METSÜREMI (MARCH) 03, 2023

₹ 5.00

14th Nagaland Legislative Assembly nung otsü tasen yanglu



Salhoutuonuo Kruse

Hekani Jakhalu

Dimapur, Metsüremi/March 02 (TYO): 14th Nagaland Legislative Assembly election 2023 nung otsü tasen ka yanglutetogo, kechiaser state legislative assembly nung tang mezüngbuba tetsür züngsem anati takok ngua liasü.

Tetsür candidate ana, NDPP nungi Hekani Jakhalu aser Salhoutuonuo Kruse nati pei-pe constituency nungi takok ngua liasü.

Hekani Jakhalu-i 3 Dimapur-III Assembly Constituency nungi takok angu aser Salhoutuonuo Kruse-i 8 Western Angami Assembly Constituency nungi takok ngua liasü.

Tetsür anaprong ya Nagaland yimtenren tsütsü mezüngbuba MLA alitsü.

Hekani Jakhalu Kense ya lawyer aser social entrepreneur ka lir aser lai Nagaland nung lanurtem nem shishilempaba tsütsü maongka agütsütsü asoshi

YouthNet Nagaland ya tentet. Lai 2018 küm Nari Shakti Puraskar award ngua lir.

Hekani Jakhalu ya Dimapur nung aso aser Bengaluru nung aliba Bishop Cotton Girls' School nung azüng aser Delhi nung aliba Lady Shri Ram College nungi political science nung bachelor degree ngua liasü.

La ya University of Delhi nung Bachelor of Laws azüng aser University of San Francisco nungi Master of Laws zünga liasü.

Salhoutuonuo Kruse ya Khonoma nungi lir aser la ya hotel kibur ka lir.

3 Dimapur-III nungi NDPP candidate Hekani Jakhalu ya Indian National Congress candidate Vetetso Lasuh, Lok Janshakti Party (Ram Vilas) candidate Azheto Zhimomi aser Independent candidates Kahuto Chishi Sumi aser Lun Tungnung nung den toktepa liasü.

Mokokchung district nungi tejak tasen pongu adokogo

Dimapur, Metsüremi/March 02 (TYO): Mokokchung district kübok Assembly Constituency ter atema Deputy Commissioner, Mokokchung indang office nung March 2, 2023 nü vote azünga maparen tebour junga temogo.

Election Observers tawabanga kübok iba maparen inyaka liasü.

Mokokchung district nungi kanga jangja takok angurtemji 30 Alongtaki A/C nungi Temjen Imna Along (BJP), 24 Angetyongpang A/C nungi Tongpang Ozukum (NDPP), 27

Mokokchung Town A/C nungi Metsubo Jamir (NDPP), 28 Koridang A/C nungi Imkong L. Imchen (BJP), 26 Aonglenden A/C nungi Saringain Longkumer (NDPP) aser 22 Arkakong A/C nungi Nuklutoshi (NPP) alitsü.

14th Nagaland Legislative Assembly nung Mokokchung district nungi tejak tasentemji 23 Impur A/C nungi T.N. Mannen (NDPP), 21 Tuli A/C nungi A. Pangjung Jamir (BJP), 25 Mongoya A/C nungi Imkongmar (NDPP) aser 29 Jangpetkong A/C nungi Temjenmenba (NDPP) alitsü.

Nübur asoshi meranga nokdak saka asen kisüng liasü: K. Therie

Dimapur, Metsüremi/March 02 (TYO): EVMs asü mesüra nüburtemi shimbar ni mejangja saka nüburtemi BJP aser alliance shimba atema maneni tepela lemsateper, ta NPCC tir K. Therie ajanga sangdong ka nung ashi.

Congress züngsemtem aser temolungertem ajak asoshi ibai ano tejashi anogo ka lir aser iba atema ni takok meshir. Tesüiba küm pongu tsüngta state assembly nung asenok shinga meliaka asenoki nübur tejangraba

bener nokdaka aru, koba Nagaland atema tongtipang ta bilem, saka asenok kisüng liasü, ta pai ashi.

Iba election osang ya civil society tem anema lir, shirnoki solution atema longkak aita arur aser alima matsüngdang Khristanpur tashi mait kumdaktsü. Election manifesto nung asenoki Nagaland melenshitsu nangzuka liasü saka ibaji nübur timbai magizük, ta K. Therie-isa ashi.

14th NLA Election 2023: NDPP-BJP alliance-i menden 37 ajangtet

PARTY	WON	TOTAL
Bharatiya Janata Party	12	12
Independent	4	4
Janata Dal (United)	1	1
Lok Janshakti Party(Ram Vilas)	2	2
Naga Peoples Front	2	2
National People's Party	5	5
Nationalist Congress Party	7	7
Nationalist Democratic Progressive Party	25	25
Republican Party of India (Athawale)	2	2
Total	60	60

Kohima, Metsüremi/March 02 (TYO): Tang yimsü tesüdak NDPP-BJP ajanga Nagaland Legislative Assembly election 2023 nung menden 37 nung takok ngutetogo, anungji parnoki ayong-ayonga kümsük tanabuba sorkar tentettsü.

Menden 59 atema polling ya February 27 nü agi aser tesem 16 nung March 2 nü vote zünga liasü.

Aonung menur osangbener senden ka nung jembidang Chief Electoral Officer Nagaland, V Shashank Shekhar-i ashiba agi, Nagaland Election 2023 nung final poll percentage ya shilem 86.92 liasü.

Tening Assembly Constituency nung timtem kar aliba ajanga election osang sangdongtsü mapang agi, ta pai ashi.

CEO ajanga ashiba den yarisema IGP (R) Nagaland, Limasunep Jami-i ashiba agi, tamakok ajurua aliba candidate busemer temi iba constituency nung repoll agitsü khanga liasü.

Ajisüaka Election Commission of India ajanga yamaji inyaksü mela malinung meinyak. Iba sülen nisung 400-500 shi ADC office telungi aittsü merang, kong vote zünga liasü, saka sepaitemi antüngen injang khashiba aser tear gas khaloktsüba sülen nisung telok adenshia aliba senshi. Asü-

amaba kata meliasü, ta pai ashi. 2018 küm NDPP-i menden 18 aser BJP-i menden 12 nung takok angus aka National Peoples' Party (NPP) nungi ana, JD(U) nungi ka aser Independent MLA ka teyari nung sorkar tenteta liasü.

Ajisüaka tan election nung paroki menden 37 nung takok angu asünungji danga political party teyari medeni parnoki sorkar kumtetsü.

NDPP-i constituency 40 nung toktep aser 25 nung takok angu, aser item rongnung Neiphu Rio densema lir. NDPP-i taoba election dang nungi taküm election nung menden tenet tali ngutet. Ajisüaka BJP menden 20 nung toktep aser taoba election den kasa jenjang nung takok angu aser item rongnung Deputy Chief Minister Y Patton aser State BJP president Temjen Imna Along densema lir.

Ajisüaka NDPP aser BJP nungi tongtipang menden kar nung tamakok ajuru aser item rongnung tang minister teinyakdak NDPP nungi Neiba Kronu ya Independnt candidate Dr Neisatuo Mero-i Pfutsero A/C nung tsükdaktsü aser Longleng A/C nung BJP minister S Pangnyu Phom ya NCP nungi tang mezüngbuba toktepsang Pongshi Phom-i tsükdaktsü.

Ano BJP minister Kashiho Sangtam ya taoba MLA aser

NCP candidate Kipili Sangtam-i tsükdaktsü.

BJP national spokesperson aser Bhandari A/C nung anaben MLA inyaka alisang Mmhonlumo Kikon ya NPP secretary general Achumbemo Kikon-i tsükdaktsü.

Ajak agi United Democratic Alliance (UDA) nung temendak MLA 30-i tamakok ajuru aser tejak tasen 27 tang Assembly-i mezüngbuba aiter.

2018 election nung menden 26 nung takok anguba Naga People's Front (NPF) nungi taküm constituency 22 nung toktep saka ana nung dang takok angur.

NCP-i menden tenet, NPP-i menden pongu aser JD(U)-i menden ka nung takok angu.

State election nung tasen tokteper Republican Party of India (Athawale) aser Lok Janshakti Party (Ram Vilas) nungia kimong mesema RPI(A) nungi menden ana aser LLP(RV) nungia menden ka nung takok ngua liasü.

Independent candidate pezüi State Assembly tongtetogo.

Takok angurtem rongnung vote tetsüngta timba agi takok angusangji Ghaspani-1 nungi BJP candidate aser MLA N Jacob Zhimomi alitsü, shibai tetsüngta vote 20,096 agi takok ngua liasü.

Iba sülen Chief Minister Neiphu Rio-i tetsüngta vote 15,824 agi takok ngua liasü aser ajak dang tetsüngta tilatiba agi takok angubaji tetsür candidate Salhoutuonuo Kruse alitsü, shibai vote tenet agi takok angu.

Congress ya 2018 nungi Assembly nung züngsem kata mali aser taküm election nunga candidate 23 yokaka katia takok mongutet.

Meghalaya nung sorkar tentettsü asoshi Conrad Sangma-i BJP teyari bushir

PARTY	WON	TOTAL
All India Trinamool Congress	5	5
Bharatiya Janata Party	2	2
Hill State People's Democratic Party	2	2
Independent	2	2
Indian National Congress	5	5
National People's Party	26	26
People's Democratic Front	2	2
United Democratic Party	11	11
Voice of the People Party	4	4
Total	59	59

Shillong, Metsüremi/March 02 (Agencies): Meghalaya nung sorkar tentettsü asoshi National People's Party tekolakba aser Chief Minister Conrad Sangma-i Bharatiya Janata Party teyari bushir.

March 2 nü election osang sangdongba nung NPP ya single largest party ka ama menden 26 nung takok angu aser BJP-i menden ana ajangtet. Menden 59 aliba Meghalaya assembly nung

sorkar tentettsü asoshi menden 30 nungdaker.

Election Commission data ajanga ashiba agi, National People's Party-i menden 26 nung takok angu, United Democratic Party-i menden 11 nung takok angu, iba sülen Trinamool Congress aser Congress party nati menden pongu-ngu nung takok angu. Bharatiya Janata Party, Hill State People's Democratic Party, People's

Democratic Front aser Independent temi menden ana-na nung takok ngua liasü aser Voice of the People Party ajanga menden pezüi nung takok angu.

Taküm Meghalaya election nung party ajak pei meden nung toktepa liasü. Taoba election nung NPP aser BJP lungjemer sorkar tenteta liasü aser taküm election nung par kisüng tokteptsü telemtetba agi.

Exit polls sangdongba sülen Sangma-i state nung tashi tait sorkar ka tentettsü asoshi telok mashi den alliance yanglutsü molunga lir, ta shia liasü. Bodhbarnü BJP lenir aser Assam Chief Minister Himanta Biswa Sarma-i Sangma den ajurutepa alliance atema jembia liasü.

Ajisüaka BJP teyari liaka sorkar ka tentettsü asoshi NPP-i ano legislator ana teyari nungdaktsü.



TIR YIMYIM YIMOBILEM (EDITORIAL)

DIMAPUR ROGONÜ, METSÜREMI(MARCH) 03, 2022

Ochitashiba inyaktsü imlar

Tang agiba election nung NDPP aser BJP telok nati government akümtsüsa takok anguba ya meimlaba mapa ka masü, anungji tesüngmangtsü mali. Parnok tia ajung, tang Nagaland nung parnok den kasasa tokteptsüsa Congress aser NPF nung tashi akar mali, anungji tangar shinga teyari medeni ayongayonga government akümtsüsa NDPP aser BJP teloki takok ngutetogo. Atangji, nübortem meima aser pei lima agi pei nüma atangtsüsa terenlok mapatem ochishia inyakdi süra, tang akümba government yagi kecha balaka nüken belem melii inyaktetsü, kechiyong government nung meinperong kecha melii shitak marakzüi bener otettsüsa parnok pei nübo agi peria lir. Atangji, tang government tasenba asoshi kanga temulung agüja inyaktsüba mapa aika rongnung kar lir. Item rongnungji tang nungibo joko linük nung Education sentong tasen ((New Education Policy) tenzüka aoe, anungji talisa Delhi nung Aam Aadmi Party government-i inyakba ama, government school-tem private school-tem dang nungi kiojen nunga aser tesayuba nunga tajungba kümdakja tanü aser asüng atema Nagaland ya tasensa yanglushi tenzüksüla. Ano kaji, tesangwa atema dang masü saka kidang aser alu nung machine amshia peisasa tajangzük anguba mapa ka mesüra kabosa tenzüka inyaktetsü atema electric tashi ya nisung alidak dang masü saka alu nung dena peria angutsüsa inyaktsütsüla. Iba denji National aser State highway dang masü saka alu lenmang tashi nung khu abenba gari ayongayonga senzütetsüsa kanga temulung agüja inyaktsüla. Tanü putu yabo kaketreju nung proxy tesayurtemi sayuba putu masü aser school kiojen aser kaketshirtem nungdakba mapatem meinyaktsü aser magütsü ser miima chiadokba putua masü. Aji oda, nübortem nem electric light agütsütsü melen transformer aser yindong yoka achiba putua süiogo. Kasaji electric bill sarua achiba mapatema putu den mapet kümogo. Aji oda, lenmangbo meyanglu mesüra mashimashi apu-apua yanglur sen agizüka achiba mapatema tesüiba otsüang ka kümdokogo. Tanü putu yabo commission aser percentage agi takar akümtsü merangba putu masü saka government den toktepa nübortem asoshi mapa aser rongsen adokdaksütsü merangtepba putu lir. Aji oda, tanübo ochi, shitak aser tajungba inyaktsü toktepba putu lir. Tanü lanurtemi itemji jangrar aser parnok nem government kaketrejutem nung kaketshisatsü dang shitak agütsütetra, light tashi shitak yoktetra aser gari lenmang shitak yanglutsüra, parnoki parnok kolok nung rezünga aliba temetetbatem agi asen lima nung rongsen jaa adokdakja yangluba asenoki angutsü. Joko, Dimapur nung yanglutor akaba state stadium-a kümsülüsü anüngdak senzürtemia menüja reprangtsüsa yamai menendoka meyui tanurtem aser lanurtem asoshi bilemja küm anasemka tsüngda renemer Sports festival ayongzüka agitsü imlaa atar. Election nung nübo aser rongsen paikaya endoka nükenbelema inyakba ya pei asoshi rongsen bushitsüba masü saka alima nung mapang tatsüka alidang nübortem asoshi mapa tajung kabosa inyaka toktsütsü tangatetba aser tebilemba nung shilem agiba mapa ka asütsü tim. Aji mesüra, asen government nung MLA aser minister inyakyonga nübortem asoshi teti atema inyaktsüba jangnep ka melira election nung belemba ajak to amajok asütsü. Joko, asen lima nunga ochiba putu tasen ka tenzük meshiogo aser ibaji government nung alirtem nungi tenzüksüla. Atangji, nisung asünungji government nung alirtema taginüba aika lir saka nisung taginübabo kodanga tatem maka aser nisungji tenük süngdaka maka. Ajisüaka, yimsüsür kati yimten yimli aser nübortem ajungtsü asoshi inyaktsü melen mapang tatsüka yimten tashi amshia alidang, pei agitsü rongsen dang bendena mongra, alima nung asen aliba jangnep maka akümtsü aser rongsenji agir magimatsüsa bendenyonga aji magishitsü, kechiyong asenoka iba lima nungi piladoktsü aser asenok piladokba sülen asen senmanger aser chirnurtemi itemji yokadoktsü. Aji oda, asenoki nübortem asoshi tajung inyaktsütsü melen morumorua rongsen bendenbaji asenok sülen senmang küm amshitsüsa chirnur tajung melira kechi sütsü ? Ibaji bilemdanga government nung alirtemi, akok tashi, alima nung mapang tatsüka alidang ya asen tsüngnepa langka nungbo yutsütsüsa kechi mapa inyakdir inyakaka, ochi agi, nendaknendaka inyaktsü bilema yimsü asütsü imlar.

OLEMSABANG

TIR YIMYIM DEN SENSAKASEMER

~ S. Nuken Longkumer, Naga United Village Dimapur

Temba Yimyim na ajuruba atema kanga pelar. Otsü aika lir anungji tanübo tebelemba ajak jembitsü tembar Yim Yim den kü tepelemba onük kar lemsateper. Shisataka Yim Yim kaket zülur nungi otzü aika dang angazüka züngshia aodang teimbakati yi tongpang aser temerük election atema jembir, temba Yim Yim sayutsungir temia iba amaji onük aika lirsürnung teraksa zünger mezüngma toktsür yi rara aser temerük election indang timba jembir!! Joko 50x50 tashi danga inyaktetra ajia tajungba dang mapang indoka jembiba amajokbo masütsü? Temba Yim Yim ozü medemer tajung kati yamai ashi, nenok Aoribo yi atema kangasa jembir saka nenokang timba ajemer amai belemer? Ozü tembar aika lir ta ashi, dang nia yamai langzü, onok ya mezüngbur tesayur asüba agi tali ajemer. Tembar Yim Yim tanü tangar limai asen tia ajak meteta lir!! Yim Yim tanü asenoki rongsen aika bendena bener China lima nungji prokdang nungibo asen lima nung timtemer aika dang lir, parnok kidangi sarasadema or sayutsungi tatsüka agutsür par kibong nem tenla tera agütsübaji ang tuluba masü na?? koda angateter?

Tembar Yim Yim 50 x 50 inyaka lir mali amai nai ah bilemer!! Mali ama belemteter?? Yim yim asenoki naga nungertemi Missionary Mirijangter 10,000 taszhi yoktsü nangzükba toh kongi aotsü nangzük?? Temba Yim Yim bendanglimai sayutsüngi aotsü asü nür ki anasa Missionary inyaktsü? Temba Yim Yim asen nupurtem majung yamai sayutsungir saka mangateter bendanglimai osang tajung abentsüba ya asen khuret tulu lir. Maotsü masü aotsubasa. Asen atepzüng kosa lir? Kechiba Tsungrem O angashir tezülen ayu. 50x50 danga inyaker lira tajungba sungjang atangtsü. Temba Yim Yim taoba mapang USA America ama takar lima nungi aser alima tesem balala nungi Tsungremer osang tajung bener aruba to par lima rongsen peria bendena ayuba dang masu par lima renemteta yutsur ang asen limai Missionary yok. Nagamese Church Naga United Dimapur nung nisung tajung aser par kibongi arogo ka reprangba angudang nuktzü alua sungmangogo. Naga nunger Missionary tem mirijangter 10,000 rongnung par kibong tena lir. Temba Yim Yim shidak asü masü??

Kü tembar Yim Yim yamaji parnoki küm noklang 200-300 shi rongsen bendena renemer ang bendang limai apuso tenla agutsüa mission mapa inyak!! Anungji bendang limai maotsü ta masü, angazüktsü aotsübasa aser mission mapa inyaktsü shibai nokdangtetsü?? Iba sulen angazüker arua asen nupur yaritsüla. 50x50 lira temoatsü. Tembar Yim Yim tanü asen lima kechisa atokter aser inyakteta lir asenok ajak atema kembir!! Asen rongsen ya koba jaka nungi arur!! Shir meyong arur Naga lima yanglutsü asoshi koma amshir? Bendang lima nungi teyari aruba ajanga tanü tazünger aika kümogo, asen lima cartem aika kümogo, ki tajung aika kümogo, aser rongsen meimer Missionary aser sayutsungirtem aika Yona taküm ama kümdaki, rongsen külemer aika küm odaki Sen Rs. Nung laor aika kümdaki, ano tali akümtsü mapang arur, iba yagi asen lima election tia maka. Sensakari kodanga temerük election memetet. Cari lemang ya danga junga ali nungbo 50x50 akümtsünliasu, asen Nagalima ya sensaker 80% lir takar tulurtem 20% shi alitsü, tembar Yim Yim otzü kaket nung anogoshi zülu yonga mangatetsü.

Tanü takar tulur temi nupur aser alimaji au tah mali par chuba menden par rongsenji dang tembar ama amanger. Election nung takok tulu angudang pelateper saka MLA atema par ki tajungka yangluteterbo ojang. Saka tembar Yim Yim parnoki mangashiyonga zülutsübasa, ayimdentsübasa. Otzü ya kecha masü mapa dang agitsü ojang!! Naga lima nungbo temenen kecha mali, yi aser temerük election ya inyaktetra takok angu nungbo Kodaki aotsü. Naga lima teraksaji reprang asenok ajak tena lir!! Yanglushitsü mapang arur asenok ano lanu tain maküm saka ariteper ama repranger?? Yim Yim onok sensakeri tangar indang nungsen timba jembir, tangar memenüpertemio tazünger takar tulur indang o tamajung jembir !! temba Yim Yim aji shirongi tsükmenatsü sungjang tanang takü tasen kümdaktsür tia maka nupurtem lir? Yim Yim tanü yi jemer aser nükdapangta inyakerbo sendokba sayutsungir aika lir ja. Parnok ji temenen pur ta jembir, Missionary tolo mirijang ter yoktsü jembir, Naga Missioni shir tenzüksü tamai inyaker!! Naga nunger meimba agi nenok renemteta yutsür bendanglimai ao. Bendanglima nung shirnok anitentsü ao? Asen lima atepzüng kong lir?? Asen lima atepzüng nungi jembiyonga amajok dang akümtsü iba jagi asen lima kibong nung tangar oshi jempiteper. Saka asenok ajak ali takong nung mejanga lir. Temba Yim Yim nisung karbo kecha mali otzü dang bendena jembia kazür mapabo kecha mali, saka aremzüka atadi. Nokinketer Yim Yim tanü atema otzü ya anena atadi tarutsü nung iba ama ano jempiteptsü tamadokma no.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Laishiba nung shia aliba ama Euphrates ayong nung tzü ajema akümer



Euphrates ayong nung tzü kanga ajema kümer aliba noksa nung angur.

March 02, 2023: Iraq nung Ministry of Water Resources-i linük nung Tigris aser Euphrates ayong na nung tzü shilem 30 agi tajemba kümogo, ta metetdaksü.

Ayong anaprongla ya Turkey nungi tenzüker.

Iraq-ibo Turkey nung dams yangluba ajanga tzü ajema akümer, ta ashir saka mongintemibo climate change ajanga ayong ana nungji tzü level ajema akümer, ta shiogo.

Anüolen Asia nung ayong talangtibaji Euphrates ayong lir. Iba ayong ya Turkey nungi Persian Gulf tashi nung mile 1,700 talang lir.

Tamangertemibo tang Euphrates ayong nung tzü ajema akümba ya Laishiba nung Jungkai Adok 16:12 nung shia aliba ataloker asütsüa akok, ta amanger.

Iba Lai tekong nung yamai shia lir, "Kodak tenyar trokbubai pa marokji Eufрата ayong tulu nung mekeploksü, aser anüdoklen nungi aruba chubatem asoshi lenmang renemtsü atema iba ayong nung tzüji kongadok."

Biblical reference indang website, Got Questions nunga yamai shia lir, "Armageddon rara atema Euphrates ayong akonger. Tatembang anogo indang shinzüka aliba asenoki kuli süa angur masü südi?"

Tatembang anogo dak amangertem aikati, iba ayong akongba ya Yisu Khrista alimai tanaben arutsü temaitsü lir, ta amanger.

Isaiah 11:15 nunga yamai shia lir, "Idangji Kibubai Egypt tzüyim temeli kongdaksütsü; aser pai mopung tatsük agi Eufрата ayong madak pa teka arakzüksü, aser ibaji ayong tila tenet küma zükshitsü aser ibaji ajanga nisungtemi tsüngsem takong agi jaja odaksütsü."

Euphrates ayong nung tzü ajema akümba ya ajanga tatembang anogo temaitsü sayur asü tsüngsarusa mesüra tzünglu ajema aruba agiar memetet, saka tamangertemi Yohan 7:38 nung ajemdaker, Yisu dak shibaisa amangdir taküm tzü ayong parnok dak nungi ayimtsü, ta ashir.

Iraq Water Ministry-ibo, Euphrates ayong nung tzü

ajema akümbaji Turkey ajanga lir, ta ashi.

2017 küm Smithsonian Magazine ajanga, India linük dak alaka alima tesem ajak den medemdangra Tigris-Euphrates basin ali telung nung tzü kanga ajema akümba satellite study ajanga bushitetogo, ta metetdakja liasü.

Euphrates ayong tesem balala akong tenzüka sülen archaeologist temi oset tapu balala aika ngutetogo aser item rongnung küm 3,400 tejaklen aliba yimti ka, hon, akhidang aliba ki tulu ka aser lungki kar densema lir.

Euphrates ayong tzü ajanga nisung million aika taküm alir, ajisüaka iba ayong nung tzü kanga ajemba ajanga aika shisabulur aser ayong akongba kuli bushiteper.

Ano nisung aikati, iba ayong nung tzü ajema akümba ya alima tatsükba akümba agi lir; iba ayong nung dang masü saka Australia aser New Zealand densema linük aika nung awatsüng aser ayongtem nunga tzü level tajemba akümer.

Uganda linük nung Muslim nunger telok kati Pastor ka dak azük

Nairobi (Kenya), March 02 (Agencies): Uganda linük nung mosque ka nung lenirtemi Khristan aser Islam yimsü tsüngda o tokteptsü atema pastor ka jaok, aser iba sentong nungji Muslim nunger 37-i Khristan yimsü agizükba ajanga Muslim nungertemi pastor dak azük.

Muslim nungertemi tejashi nung arrshi küm 42 pastor Arthur Asadi Babi dak azükba sülen pa Mbale yimti nung aliba hospital ka nung anogo ti monga liasü.

Muslim nungertemi azükba ajanga pastor Arthur tekong yiru, tetsüng ka aser teben ka teret sükdang aser pa miim oset waaka liasü, ta Living Stream Church of Christ Arogo nung putir, Michael

Okia-i metetdaksü.

Osangbener den jembidang Okia-i, "Nakaloke mosque nung shiekh-i shidi ka ajanga Mbale yimti kübok Nakaloke ward nung o tokteptsü atema onok jaoka liasü. O entepba sentong nungji shilem agitsü atema ni pastor Babi yoktsü telemtetba agi, kechiyong pai Koran (Muslim nunger temeshi kaket) aser Laishiba junga meteta lir," ta metetdaksü.

February 9, 2023 nü Pastor Babi leniba nung Khristan telok kati Muslim nunger den o entepba sentong nungji shilem agia liasü; iba mapang nungji pastor-i Koran nung aliba-a tetsü Khristan yimsü pusema jembi; Yisu Khristaji Tsüngrem chir aser Tebu Tsüngrem dangi aotsü

lenmangji Khrista ajanga dang lir ta pastor-i jembia liasü, ta tongti putiri metetdaksü.

"February 10 nü tatembangbuba o entepba mapang nung pastor-i lokti dang Khrista dak amangtsü ayongzüka liasü, ajioda Muslim nunger tanur 8 aser tain 29-i Khrista nem taküm bendanga agütsü," ta Okia-i metetdaksü.

"Muslim nungertem jagi Khristan yimsü agizükli Muslim nungertemi long aser süng amshia kü dak azük; parnok Khristan yimsü agizükertem daka azük," ta Pastor Babi-i metetdaksü.

Küm tenet tejaklen Pastor Babi-i Islam yimsü toktsür Khrista agizüka liasü aser par Arogo ya mosque nungjagi kilometer 4 shi dang pilar lir.

ANO GO ABEN TSÜNGREM DEN

Tsüngrem Koda Tashi Tait Lir

(T. Ken 68:28-35)

Asen tashi agi asenoki talangka metetter. Yangi Dawidi tashi angatetsü indang ashir. Paji tashi tait Tsüngrem ta angatettang ta pai ashir. "Pa merenba Israel madak lir, aser pa tashi anüngtem nunglir" (t.34). Iba tetezü pa tashi temaba nung lir. Tsüngremi mepet nungia tashi agitsü akok. Asenoki Tsüngremji temeim, taochi aser yimlibilem Tsüngrem ta bilemer. Saka asenoki Paji tashi tait Tsüngrem taaka bilemdi.

Asenoki Tsüngrem nungi tashi asüngdangtsü akok. "O Tsüngrem, na shibai onok asoshi inyak, nai ne sasa tashi itta sayu" (t.28). Tsüngrem dangi arua tanü asen nüngdak tashi Tsüngrem dang asüngdangtsü asenok maongka kar. "Saka shirnoki Kibuba dang ataa alir parnok tashi tasen angutsü: mungzütem ama tashikang agi atutsü; parnok asemtsü, aser aniseta malitsü: parnok jajatsü, aser melulatsü" (Isa.40:31). Tsüngremi Pai kechi inyakner aji inyaktsü mulungtetogo. Kodang asenoki mepishidir pai aji inyaktsü. "Nenok kecha maka kechiaser nenoki masüngdang" (Yakob 4:2).

Tanabuba, asen tashiji Tsüngrem lir ta asenoki metettsüla. "Israel Tsüngrem, pai pei nübur nem tashi aser ain agütsür. Tsüngrem temoatsüba süang" (t.35). Tanü na tashi nüngdakra ne sasa dak tereprang mesüra tangar kar dak teranglok. Anünglen repringang, kechiaser Tsüngrem yangji lir, aser nai asüngdangra Pai ne nem tashi agütsüner.

Aiben ne tashi alima nungi agitsü Satani atidanger. Kodang aji atalokdir iba ken ochi ya bilemtetang. Raraji maneni aotsü atema kodang na tashi nüngdadir, sarasadem nung Tsüngrem den mapang agiang. Tashi Pa nem nunglokjang, Pa dang tashi asüngdangang, aser Pa nungi ne tashiji lir ta metettang.

Missionary Ryan Koher atema sarasadem inzü tenzüker



Missionary Ryan Koher'er kibong noksa nung angur.

March 02, 2023: Ita pezü tejaklen Mozambique nung missionary pilot ka apuba sülen temelungertemi tanen makai lumia sarasademtsü atema sarasadem inzü tenzükerogo.

Mission Aviation Fellowship (MAF) nung inyakertemi US nunger missionary pilot Ryan Koher aser South Africa nunger melungtet telok nung inyaker ana chioktsü atema sarasademjang, ta ayongzüka liasü.

Tesüiba küm pongu tashi Mozambique linüki Cabo Delgado province nung Islamic kiralongrartem anema rarar. Iba rara ajanga nisung million 1 dak tema jenshiogo aser nisung 4,000 dak tema süogo. Arrshi küm 31 missionary, Ryan Koher-i chiyungtsü aser mozü densema teyari balala orphanages-i bener otsütsü lia pa apu.

Pa apuba sülen pa kinüngtsü Annabelle den jabaso anabo US-i anir oa tang Idaho nung aliba

Mission Aviation Fellowship indang headquarters nung lir.

MAF-i ayongzüka sülen linük 25 nung staff 1,500 dak temai ghonda 24 shia melentepa missionary atema maneni lumia sarasademtsüdar.

Missionary kinüngtsü, Annabelle-i, "Ryan atema lumia sarasademtsüba aser sarasademtsütsü atema tangar-a ajungshiba atema ni nenok ajak dang pelar. Tsüngremi asen sarasadem angashia langzüksü, ta ni amanger," ta lemsatsep.

"Tenüngsang Ken 5:3 nung shia aliba ama Kibubai mapa inyaktsü, ta asenoki amangdi aser Pai inyaktsü aliba atema tenüngsang agütsütsü renema lidi," ta laisa lemsatsep.

AO OSHI ANGAZÜKDAK:

TANÜ ANGAZÜKTSÜBA OJANG



Pakshi

(v) pei pei senshia ao (disperse)

* Lokti senden temer nisung ajak pakshi.

Paktem

(n) tsük ayutsü atema pakti alemba (placing mat to keep paddy rice)

* Alorudang tsük ayutsü atema jendang paktem ayur.

OLONG PAITEP # 6443

Grid for OLONG PAITEP # 6443 with numbers 1-17 and shaded cells.

TIPILEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S _ _ _ i - (3)
9. Nisung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatemangliba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzüma nung senzüba - (5)

OLONG PAITEP # 6443 TELANGZÜBA

TIPILEN :

- 2. Bangsemo, 6. Tiptem, 8. Jen, 9. Talila, 11. Aren, 12. Tzübo, 14. Alia, 16. Angati, 17. Odi, 18. Azü, 19. Sünglang.

LANGTSÜNGLEN :

- 1. Yipten, 3. Nüja, 4. Sangro, 5. Milen, 7. Tulu, 10. Laza, 11. Aben, 12. Tiyong, 13. Ajizük, 14. Aitsü, 15. Tasa, 16. Aina.



CLASS ROOM NUNG :

Missla : Tatishitsü agi nenok ya millionaire ka ka aküm, süra nenoki kechisa inyaksü, nisung shia paragraph anana züluang.

(Tanurtem ajak aritepa zülutsü tenzük, saka Alokba bo kecha mezülui aliba ngur Misslai asüngdang)

Missla : Alok, nabo kechiba mezülur?

Alokba : Secretaryla atarba ati, millionaire-isa zülur?

-Lilir : WhatsApp

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

JDU Nagaland-i tenüngsang agütsü

Dimapur, Metsüremi/March 2 (TYO): Janata Dal United Nagaland-i sangdong ka ajanga, tawa tembangba 14th Nagaland Legislative Assembly election nung JDU nem vote agütsürtem ajak dang kanga pelaba lemsatepogo.

JDU pur "Development with Justice" omen nung ajemkdaker election nung toktep ajisüaka Assembly nung nübu telong junga maliba ajanga koba manifesto nung ajemkdaker election toktep iba ama mapa minyaktet. Ajisüaka JDU-i maneni iba nükjidong ataloktsü asoshi inyaksü koba lenla ajak nung trenlok aser ochi mashi

1 Dimapur-I ACCC-i pelaba lemsatep

Dimapur, Metsüremi/March 2 (TYO): 1 Dimapur - I Assembly Constituency

ACC tir Hovikhe Chophi-i sangdong ka ajanga 1 Dimapur - I ACCC aser Candidate K Therie tenüng nung 1 Dimapur-I Assembly Constituency nung voter ajak dang parnok indang temeden amshia vote agütsüba atema tenüngsang agütsüba den kanga pelaba lemsatepa liasü.

inyakyim raktoktsü atema lir. JDU-isa, 12th Tseminyu constituency nungi JDU party nungi takok angusa Jwenga Seb nem tenüngsang agütsüogo.

Maneni JDU-i nüburtemi shimba ajaki agizüktetsü aser election tembangba sülen mepetmesü balala atoktsü aliba nungi pila alitsü aser result tajungba angutsü aser electorates tem nungi telangzüba tajungba agütsütsü atema taruba kümpongu meranga inyaksü atema ayongzüker, ta JDU Nagaland tir Senchumo Nsn Lotha aser General Secy Imsumongba Pongen nati külem sangdong ka ajanga lemsatep.

"Onoki constituency nung nüburtem tejangraba agizüker aser tarutsü nung tashi taitba meyipa arutsü nangzüker," ta pai ashi.

Paisa, "onoki takok anguba candidate H. Tovihoto Aye nem tenüngsang agütsür aser constituency ajangzüksü mechi nung khuret angatetba opposition ka ama yariteptsü maongka agütsür," ta ashi.

Dimapur Press Club-i aitsür Dimapur, Metsüremi/March 2 (TYO): Nagaland State unit BJP media cell convenor Sapralu Nyekha kinungtsüi Kohima Press Club züngsem ka amokmerenba osang angashia Dimapur Press Club aoksaba aser shisabulua bilemba sangdong ka ajanga lemsatepogo.

Osangbenertem ama sorkar, political party balala, kija aser loktinet balala den mangatettep adokba aser tebilemdangba balala asüba onoki angateter aser tangazükba ka ama züngshir. Ajisüaka iba tashimait agizükba tetezü amokmerentsü jaokba ka masü aser talisa national political party ka indang media cell convenor kinungtsüi lanurtem teyari agia osangbener ka ki bushiteta arua amokmerenba magizüker.

Media professional lokti tentet ka ama DPC-i, mangatetteptem ajaki agizüktetsüsa bentettsüla ta angateter. Amokmerenba nung meraket kecha mali.

Onoki KPC nem teyari agütsütsü matidaker aser osangbener amokmerenba aitsür. KPC den DPC nokdaka lir aser iba osangbener dak langka danga atalokra media cell convenor aser Nagaland BJP lenirtem ajak kasa khuret asütsü, ta Dimapur Press Club sangdong ka ajanga metetdaksü.

Tripura nung ano BJP-isa sorkar kumtetsü

Agartala, Metsüremi/March 02 (Agencies): Yongya ataba ama Tripura nung BJP-isa kümsük tanabuba atonga sorkar kumtetsü, kong parnoki menden 32 agitet aser vote agütsür 9,85,797 (shilem 39) liasü.

Regional TIPRA Motha party-i menden 13 nung takok ngua opposition party tuluba akumer aser iba sülen CPIM-i aniba Left Front ajanga menden 11 aser Congress-i menden asem nguteta liasü.

CPIM-i aniba Left Front yagi vote shilem 27, Indian National Congress-i shilem 8.6 aser TIPRA Motha-i shilem 20 dang tera agi timba nguteta liasü.

Vote ya assembly constituency 60 nung aliba

tesem 21 nung zünga liasü.

9-Banamalipur assembly constituency nungi Indian National Congress candidate Gopal Chandra Roy-i Tripura Pradesh BJP president Rajib Bhattacharjee madak vote 1,369 agi koka liasü. Ano 19-Charilam assembly constituency nungi INC candidate Ashok Debbarma-i Deputy Chief Minister Jishnu Dev Varma madak vote 858 agi takok angu.

23-Dhanpur assembly constituency nungi Union minister of state Pratima Bhoumik-i CPIM candidate Kaushik Chanda madak vote 3,500 agi takok angu.

BJP alliance IPFT ajanga menden pongu nung toktep saka South Tripura district nung 38-

Jolaibari assembly constituency nungi dang IPFT candidate Shukla Charan Noatia-i CPIM candidate Debendra Tripura madak vote 375 agi koka liasü.

Chief Minister Prof Dr Manik Saha-i vote margin 1,257 agi general election mezüngbuba kokogo.

6-Agartala assembly constituency nungi MLA ama kümsük pongu inyaka arusang Congress MLA Sudip Roy Barman-i BJP candidate Papia Datta madak vote 8,162 agi koka liasü.

Taoba mapang MP inyaka alisang aser CPIM candidate Jitendra Chaudhury-i 40-Sabroom assembly constituency nungi vote 396 agi BJP MLA Sankar Roy tsükdaksü.

Manipur nung Meitei nungertem ST list nung züngoksemtsü akhang



Imphal, Metsüremi/March 2 (Agencies): Scheduled Tribe Demand Committee of Manipur (STDCM) nungi activists temi tesem ana nung longka aita Manipur Legislative Assembly-i aotsü meranga liasü. Longkak aiterem timba tetsürtem liasü.

Brehostibarnü 12th Manipur Legislative Assembly session 3buba tembangtsü anogo ka lia parnoki Manipur Legislative Assembly-i aotsü merangba ya police temi Lamphel Super Market, Imphal, aser Imphal West district kübok Wangoi

nung sota liasü.

Longkak aitertemi placards amer Meitei/Meitei nungertem temzüng ozüng kübok Scheduled Tribe (ST) list nung züngoksemtsü aser Assembly session amenba mapang Meitei/Meitei nungertem ST nung züngoksemtsü atema temsüa ali mali iba indang kuli tejangja agütsütsü atema Centre-i akhangba yoktsü asoshi ajang ajanga nokdaksü takhangba agüja liasü.

Lamphel Super Market Nupilup (Women's Vigilante Group) otongdar N Ibemcha

Devi-i ashiba agi, onoki state sorkar dang küm aika iba report agütsütsü mepeshia aruogo, saka tang tashi osang tejangja agüja mali. Ajisüaka STDCM-i ajurutepta MLA temiba iba takhangba ya ataloktsütsü atema parnokia takokba tashi inyaksü ta tenangzüka agütsüogo.

Kasa mapang nung Chaoba Meitei-i ashiba agi, Meitei/Meitei nungertem ST list nung züngoksemba ajanga dang tarutsü nung Meitei kin sama aotsü ana nung aliba nungi kümzüksü.

Greece train lendong nung asür nisung 43 jungogo

Athens, Metsüremi/March 02 (Agencies): Train ana tsüktepa nisung 43 tashi asüba ya nisungi aibelenba lir, ta Greek Ato Kilonser Kyriakos Mitsotakis-i tenüing asen, koba Greece nung train lendong tamajungtiba lir aser ibaji ajanga transport minister mapa nungi anen.

Iba lendong ya Larissa yimti tezülen Mongulbar aonung atalok, kong passenger train ka linük yimtiba Athens nungi Thessaloniki leni aodang khu abenba train ka iba yimti nungi arua tsüktepa liasü.

Tsüktepa mapang passenger carriage kar mi adoka apok.

"Iba lendong ya tulubaka meimchir aibelen nungi lir ta ajaki sayur," ta taküm re-election asoshi meranga alisang Mitsotakis-i Bodhbarnü ashi.

Greece indang transport minister Kostas Karamanlis-i lendong atalokba tesem semdangba sülen mapa nungi anen aser yamaji inyaksü pa mapa ama bilemer ta ashi.

"Timtem ya tepang agi meshiteter. Lendong tulu kar atalokdang kecha masü ama

alitsü makok," ta pai ashi. "Asen linük nung nübürtemi political system nung tamang akatsü ya asen democracy atema tongtipang lir. Iba dang political responsibility ta ajar."

Ketdangsürtemi Larissa yimti nung stationmaster apu, kong train ya tatemsa anena liasü. Parnoki iba nisungba tenüing mesüra kechi kuli ajanga apu, ibaji masü saka iba train lenmang nung rail traffic ya stationmaster teinyaksü lir. Pa Brehostibarnü prosecutor matsüngdang nokdaksü aser iba sülen ken o benoktsü.

Rail operator Hellenic Train ajanga ashiba agi passenger train nungya nisung 350 mener Athens nungi nikongdang 7:22 (par mapang) nung apusoa liasü.

Larissa indang chief coroner Roubini Leondari-i ashiba agi, la dangi nisung tasü mang 43 bener aru aser parnok jangjatetsü atema DNA identification nungdaksü.

"Asürtem ya timba lanurtem lir. Parnok temang kanga mejungi raksar," ta lai ashi. Greece indang firefighting service ajanga

ashiba agi, Bodhbarnü menur mozü kidang nisung 57 liasü aser item rongnung intensive care nung trok lir. Nisung 15 dak tema temang anepaluba sülen mozüki nungi yok.

Nisung 200 dak tema meyiru mesüra tera yiru aser parnok ya bus nung Thessaloniki-i anir ao. Samar alirtem metetsü mechi police temi parnok tenüing zülutena liasü.

Asürtem rongnung rail employees ti lir aser item rongnung khu abenba train driver ana aser passenger train driver ana lir, ta Greek Railroad Workers Union tir Yannis Nitsas-i ashi.

Sorkari railway senzuka yutsüba ajanga iba lendong ya atalok, ta iba union yagi ashi.

"Tia mapa onoki mapang talangka nungi staff tem shimtsü, training tajungba agütsü aser modern safety technology atema akhangba teti kaket tamajung bendenba molok nung tembanger," ta sangdong ajanga ashi.

Train nung nisung asüba asoshi Athens nung lefr-wing teloktem nungi nisung noklang aika Bodhbarnü menur longkak aita jaja liasü.

Tepela Tasoba Anogo



ASO : 03/03/1943

Temjen Aier, Waromung

Temeim Oba, Tsüngrem taochi agi tanü na küm 80 junga anir aruba tepela lemsateper. Maneni Obala nem anema aliba aser arishi talang moajangma.

~ Temeim Kinungtsü, Chirnur, Semchirtem & Kinungertem.

GOVERNMENT OF NAGALAND DIRECTORATE OF HEALTH & FAMILY WELFARE

NAGALAND: KOHIMA.

NO. DHFW-3/VACANCIES/DRV/DTE/19-20

Dated Kohima, the th March 2023

ORDER

As per the advertisement order No. DHFW-3/VACANCIES/DRV/DTE/19-20 dated Kohima the 22nd Dec. 2022 and Government approval Order No. HFW(A)-12/81/2019/77 dated Kma 9th Feb. 2023 based on No. ELE/COT-165/2023 Dated 7th Feb. 2023, the names and Roll. No's of the selected candidates are hereby given on merit basis.

Sl. No	Name	Roll. No	Remarks
1.	S. HangshaKonyak	785	
2.	Jisullie	747	
3.	SebizotoRino	494	
4.	LorhosieJoshou	132	
5.	Anyak K	280	
6.	VilahetuoTseikha	259	
7.	Dzuingulie	436	
8.	Daniel Sumi	508	
9.	Watinungsang	411	
10.	M. Yanchukumba	265	
11.	P. Keye	408	
12.	Shamjei	471	
13.	Tongpangsunup	816	
14.	P. Chingnung	372	
15.	Mhiesineikho Thou	750	
16.	KumughaviKinimi	811	
17.	Toklong	184	
18.	ViphrezoMejura	609	
19.	SentilembaAonok	232	
20.	ChingvenKonyak	734	BT, Konyak
21.	VenecuyiMedeo	442	BT, Chakhesang
22.	T. Limekhum	478	BT, Sangtam
23.	PhangloulPhom	214	BT, Phom
24.	Foriegnthong	259	BT, Yimchunger
25.	K. Pieckoakam Chang	249	BT, Chang
26.	Langhen	680	BT, Khiamniungan
27.	Apetbe	589	BT, Zeliang

(DR. VIBEITUONUO M SACHU)

Principal Director

Directorate of Health & Family Welfare
Nagaland : Kohima.

PELABA LEMSATEPER

14 Buba Nagaland Legislative Assembly election 2023 nung candidate ka ama toktepdang, Mongoya sangertem dak alia ano ana aser talang nungi shirnokisa nübu, rongsen, shisatsü den sarasadem aser senti vote ajanga yaritepogo, nenok ajak dang mamatetba tepela lemsateper. Nenok mapa tajung ni kodanga mamatoktsü.

Tanü ni election nung tamakok ajuruaka, asenok lungjemba ya takok tulutiba asütsü. Iba telongjem ya meraksai külemi longjemer nübür tenzüksü ayongzüker. Election nung madokaka ni nübür den yariteptsü teti mulonga lir

Tsüngremi Mongoya sanger aser Congress meimer ajak maneni moajangma.

Sd/-

S. Supongmeren Jamir
Congress Candidate for
25 Mongoya A/C

Philippine tanker ka totzü yimshia tzüyim telungi alu

Manila, Metsüremi/March 02 (Agencies): Khu abenba rong ka sünga industrial fuel oil litres 800,000 (210,000 gallons) bener tzüyim telungi aluba Philippines ketdangsür temi bushia agitetsü maparen tenzükogo.

Princess Empress ya linük yimtiba Manila anasa Bataan province nungi Iloilo province leni Mongulbarnü aoba mapang gol nung timtem adoka tzü telungi alu.

TZüyim nung inshia aliba ya iba rong indang gol nungi diesel totzü lir aser rong nung bena aliba industrial oil masü, ta Philippine Coast Guard-i mezüngbo shia liasü.

Ajisüaka tzü nungi bendenba sample tem tendangba nung industrial oil kar Oriental Mindoro province anasa tzüyim nung inshiba sayur, ta coastguard temi Brehostibarnü ashi.

Bodhbarnü tashinung totzü ya 24sq km (9 square miles) tashinung inshir liasü, ta coastguard temi ashi. Tzü nung diesel totzü kwi aser industrial

fuel totzü kwi aliar mejangja. "Tzü telungi aiba mapang rong raksar alitsü aser tapok paa totzü temai adoka inshia alitsü," ta Philippine Coast Guard odongtar Rear Admiral Armand Balilo-i ashi.

Iba fuel oil ya tanker nung indang-indanga inok aser ibai sealed containers masü, aser Proncess Empress tzüyim telungi aluba ya metre 400 (feet 1,300) dak tali tarok lir, anungji divers temi metongteter, ta Balilo-i ashi.

Tanker ya bushia tozü temai adokba adangtsü maparen tenzükogo, ta Oriental Mindoro provincial Governor Humerlito Dolor-i ashi.

"Coastguard temi tesem jangjatetba sülen totzü ya meseptetsü renema lir ta shiogo. Tia maka tayimtsü nungi anaben tashi bushia jajar tang tashi rong aliba tejangja monguteter," ta Dolor-i ashi.

Coastguard temi totzü inshiba aziüoktsü meranga oil spill booms yokogo aser tzü

nung totzü raksatsü asoshi mozü khaloktsü. Tzüikum nung angopur aser tourism operator tem takum alitsü asoshi tzüyim nung metaloka lir aser itemji lendong nung lir.

Iba totzü inshiba ajanga Verde Island Passage (VIP) densema marine protected area 21 nung kongshir, ta Philippine Department of Environment and Natural Resources ajanga ashi.

VIP strait nung aliba tzü yagi nisung million ana dak tema nem chiyongtsü agütsür aser takum lidaktsür, ta environmental group temi ashir.

Totzü ya Naujan aser Bongabong municipality tsüingta aliba tzü mile 37 shi nung jangjatetogo, ta Oriental Mindoro disaster operations chief, Ram Temena-i ashi.

"Tzüikum anasa ango metsüba tesem aika lir," ta Temena-i ashi.

"Totzü ya coral reefs nung menaloka alitsü akok, anungji tzüyim nung aliba takumsangnu dak kongshitsü."

Vietnam tir inyaksü Vo Van Thuong shimogo

Hanoi, Metsüremi/March 02 (Agencies): Vietnam nung ochimashi mapa inyakba anema maparen tenzuka aliba mapang linük nung lenirtem shimshidang National Assembly ajanga tir inyaksü Vo Van Thuong shimogo.

Brehostibarnü extraordinary session ka alidang legislator temi arishi küm 52 tain Thuong ya tir inyaksü jangjatsü, kechiaser tang yimsü tesüdak

Communist Party ajanga pa Bodhbarnü shimtet aser tetokteper kata meliasü.

Tir mapa ya timba tema tazütsü ka dang lir saka Vietnam nung yimtenren tsütsü tematiba jenjang pezü rongnung ka lir.

National Assembly nung aliba deputy 488 nungi parnok 487-i Thuong nem vote agütsü, ta osang ajanga ashir.

Vietnam nung ajungbena yimten yimsüsüba tsütsü

temelenshi ka aruba mapang Thuong ya shimer, kong tashi tait Communist Party nung ochimashi mürekba mapang ka lir aser telok balala tsüingta rara adoka minister aika mapa nungi anentsü.

Pa kübok ketdangsür temi aibelenba aser tim masüba mapa inyakba atema party temi tenüing asenba sülen January ita ajungbena Thuong jakdang inyaka alisang Nguyen Xuan

Phuc anentsü.

Tir menden nungi Phuc anentsüba ya linük nung ochimashi mapa inyakba anema nokdakba tetenzüker ka ama liasü.


Vietnam indang tir tasenba ama parliament nung mezüngbuba jembidang Thuong-i maneni ochimashi anema raratsü, ta ashi.

"Party, linük aser nübürtemi nungloktsüba mapa aser

mission tem ni akok tashi tajungtiba nung inyaksü," ta tir tasenbai tenangzükerba agidang shia liasü.

Pa Tir Ho Chi Minh ideology, morality aser takum yimyatem asadanga anidaktsü nangzüker.

Party indang Politburo nung Thuong ya züngsem tanubotising lir saka university nung azüngba mapang nungi pa yimtenren nung tetsüing ajemoka liasü.



NATIONAL PEOPLE'S PARTY NAGALAND



"One Voice One North East"

Heartiest Congratulations!!

"From the LORD comes deliverance. May your blessing be on your people!" – Psalms 3:8



9 | DR. TSELHOUTO RHUISO
Kohima Town AC



22 | SHRI NUKLOTSHI
Arkakong AC



48 | SHRI A. NYAMNYEI
Moka AC



57 | SHRI BENI M. LAMTHIU
Thonoknyu AC



59 | SHRI C. KIPILI SANGTAM
Seyochung Sitimi AC

The NPP Nagaland extends its warmest congratulations to all our successful candidates on their hard-earned victory. It is a testament to their dedication, perseverance, and the grace of God that they emerged victorious on all fronts.

We would also like to express our gratitude to the people of various constituencies for placing their faith in the NPP Nagaland and for electing our candidates. We pledge to work tirelessly towards the progress and development of their constituencies and the state of Nagaland as a whole.

To those of our candidates who did not make it this time, we would like to offer our unwavering support and encouragement. It is important to remain optimistic and to not lose heart. We believe that with hard work and dedication, we will overcome all the shortfalls and emerge even more victorious in the next election.

Santosh Trophy: Meghalaya aser Karnataka na final asayatsü

Metsüremi/March 2, 2023 (Agencies): Bodhbarnü Santosh Trophy national football championships semifinal asaya nung Punjab aser Services na akokba sülen Meghalaya aser Karnataka na final asayatsü.

Mezüngbuba semifinal asaya nung Meghalaya team-i goal ka chir aliba nungi meyipa arura iba asayamung tiben tashi koker aliba Punjab team goal 2-1 agi koka tang mezüngbuba final-i iogo.

Tanabuba semifinal asaya nung Karnataka-i goal 3-1 agi Services madak takok ngua küm 37 sülen tang mezüngbuba final-i iogo. Services puri taoba küm 10 tsüingda iba asayamung

ponguben koka lir. Karnataka team tatesma 1975-76 season nung final tonga asaya kong parnok Bengal-i tsükdakja liasü.

Meghalaya aser Karnataka na tsüingda final asaya Honibarnü asayatsü aser tasembuba jenjang atema Punjab aser Services na kasa anogo mezüngbuba asayatsü.

Punjab team pur asayamung tepeyong asaya ka nung danga tamakok mongui semifinal tonga liasü. Parnok mezüngbuba aser tanabuba round naprongla nung parnok telok nungi temaba jenjang nung liasü.

Semifinals, third-place play-off aser final asaya ajak tang mezüngbuba bendanglen oa

asayatsü. Mezüngbuba semifinal nung Punjab atema Paramjit Singh-i minute 16buba nung mezüngbuba goal idaktsü ajisiüaka Meghalaya team nungi Figo Syndai minute 37buba nung iba goal küptoka liasü.

Meghalaya team tang mezüngbuba semifinal asaya liasü aser goal kaka idaktsüba sülen parnoki asaya mapang talangba ka amokbanger asaya saka goal midaktsüteti liasü.

Ajisiüaka mapang apuloktsür asayaba mapang Sheen Stevenson Sohktung-i minute 90+1 nung par team atema tanabuba goal idakja liasü.

Tanabuba semifinal asaya nung Services aser Karnataka

na prongla kasasa toktepba asaya ajisiüaka asaya mezüngbuba shilem tembangtsü minute pongu dang anunga lir goal asem idakja liasü.

Asaya nung mezüngbuba goal ya Services pur atema Thapa-i minute 40buba nung idaktsü.

Ajisiüaka minute ana dang lir Robin Yadav-i Karnataka atema mezüngbuba goal idaktsü aser P Ankith-i tanabuba goal idakja parnok 2-1 agi tejakdang aküm.

Iba sülen asaya tanabuba shilem nung minute 77buba nung M Sunil Kumar-i Karnataka atema tasembuba goal idakja parnoki asaya goal 3-1 agi akok.

EPL: Arsenal-i goal 4-0 agi Everton kokogo

Metsüremi/March 2, 2023 (Agencies): Premier League nung temaba jenjang nung aliba Arsenal-i Bodhbarnü kidang Everton koka parnok tanabuba jenjang nung aliba team dang nungi point pongu agi timba küma jenjang yanglushiogo.

Emirates Stadium nung Arsenal-i goal 4-0 agi Everton akokba asaya nung Gabriel Martinelli-i goal ana idakja liasü.

League nung asaya 25 asayaba sülen Arsenal pur tang temaba jenjang nung point pongu agi timba kümogo. Manchester City den kidang

asaya makokba sülen Mikel Arteta-i aniba team-i asaya asembuba atonga kokogo aser parnoki asaya 25 nungi point 60 nguteta lir aser tanabuba jenjang nung City-i point 55 ngua lir.

Asaya nung Bukayo Saka aser Martinelli nati asaya mezüngbuba shilem nung goal kaka idakja parnok tejakdang aküm.

Iba sülen asaya tanabuba shilem nung minute 71buba nung Captain Martin Odegaard Arsenal atema tasembuba goal idaktsü aser Martinelli-isa pa atema

tanabuba aser team atema goal pezübuba idakja parnoki asaya ayong ayonga akok.

Everton puri Arsenal nung arua 27 ben asayaba nungi ka dang koka lir aser Bodhbarnü asaya nung parnoki goal idaktsütsü imla liasü, ajisiüaka goal achiba sülen parnok atsüzüka aküm.

Iba asaya densema parnok league nung asaya 14buba nung tamakok nguogo.

Parnoki tang tashi nung point 21 dang nguteta lir aser ponglang nungi zünga atu nung tasembuba nung lir aser parnok meket aliba team tem

dang nungi asaya ka talila asayar lir.

Everton pur tang mezüngbuba Premier League nungi relegate asütsü ana nung aliba mapang Arsenal purbo 2004 küm sülen tang mezüngbuba Premier league akoktsü asoshi timla nung lir.

Everton puri February ita tetenzüklen Sean Dyche lenisüba nung mezüngbuba asayaba mapang Arsenal goal 1-0 agi koka liasü.

LLC: Gambhir lenisüba nung India Maharajas asayatsü New Delhi, Tsüklai/February 2 (Agencies): Legends League Cricket (LLC)-i Brehostibarnü sangdong ka ajanga LLC Masters nung shilem agitsü aliba team asemprongla indang captain sangdongogo.

Iba asayamung ya Asian Town Cricket Stadium, Doha, Qatar nung March 10 nü nungi tenzüka asayatsü.

Iba asayamung nung India Maharajas team taoba mapang India team opener Gautam Gambhir lenisüba nung asayatsü. Asia Lions team taoba Pakistan all-rounder Shahid Afridi aser World Giants team taoba Australia captain Aaron Finch lenisüba nung asayatsü.

"Ni LLC nung taoba mapanga shilem agiogo aser iba asayamung nung shilem agitsü teti jangrabangra bilemer. Iba asayamung ajanga asayaba moapu nung maneni toktepba asaya aser taoba mapang külem asayartem den maneni asayashitsü maongka agütsür. Ni Indian team aser domestic circuit nung asayaba mapang India Maharajas nung züngsem ajak den asayaogo. Team lenir ka ama onoki asayaba yimya tajungtiba sayutsü ta fan tem nem tenangzükba agütsür," ta Gambhir-i ashi.

"Asayar tajungtem aliba team ka len anitsü maongka angubaji kü atema tetushi tulu lir. Ni Shoab, Hafeez, aser Razzaq nunger amala taoba mapang külemi asaya alirtem den asayatsü maongka anguba atema kanga pelar. Team asemprongla nung taoba mapang tetokteper, tembar ama asaya tulu karbo asayatokogo. LLC Masters nung alima ajanga nung cricket asaya meimertem jangrademdaktsütsü atema ano maongka anguba atema kanga pelar," ta Afridi-i ashi.

Kasa mapang nung Finch-i, "LLC Masters ya asayamung balaka lir aser iba asayamung nung asayashiba atema kanga pelaba dang masü taoba mapang asayar tajungtem ngua menungra bilemer. Maneni team nung Shane Watson aser Brett Lee nunger densema aliba ajanga tali tejangraba kümdaktsür aser mezüngbuba asaya asayatsü yongya atar," ta ashi.

Legends League Cricket Masters mezüngbuba asaya Maharajas aser Asia Lions na March 10 nü asayatsü.

BILEMDANGANG
"Tamakoker medeni takoker mejangjar."